



21352

kat.komp.

III

Mag. St. Dr.

P

Casimirus

Princeps


Doenthoff Joann. Frid. tra triplex spei publi

PANEG. et VITAE

Polon. Fel.

Nº 1210.







ARA TRIPLEX  
SPEI PVBLICÆ,

AVGVSTÆ, SACRÆ,  
FORTVNATÆ.

IN ADVENTV

SERENISSIMI  
PRINCIPIS POLONIA-  
RVM SIGISMVNDI CA-  
SIMIRI.

SERENISSIMO  
RVM, VLADISLAI IV  
& CÆCILIAE RENATÆ RE-  
GVN POLONIAE, PRIMO-  
GENITI.

*Ab Alma Academia & Vniuersitate Vilnensi SOC: IESV erecta.*

Eidemq; Serenissimo Principi.

*Per*

JOANNEM FRIDERICUM DOENHOFF in eadem Academia  
Logices Auditorem dedicata.

ANNO DOMINI M. DC. XLIII.

VILNÆ.

*Typis Academicis Societatis IESV.*





21.352 III



AD

SERENISSIMVM  
SIGISMVNDVM CASIMI-  
RVM POLONIÆ PRINCIPEM,  
SVECIÆ, GOTTIÆ, VANDA-  
LIÆ HÆREDEM.

**S**pes Orbis loquimur, cùm de Te loqui-  
mur, Princeps Serenissime Ea nimi-  
rum magnitudo Fortunæ, honor digni-  
tatis, fœcunditas virtutis, in Tuo flo-  
re prorumpentis est, ut spes, quibus nihil vasti-  
us; animos, quibus nihil capacius, expleas uni-  
versorum. Magnorum hæc gloria Principum,  
& Tua: quia Tu quoq; Magnus, cùm tantus. In-  
telliges itaq; quæ diximus, etsi non legeris; cùm  
nihil in nostro contineatur stylo, quod in Tuo  
spectandum non exhibeatur animo, & indole.  
Gaudent libri tam felici compleri materiâ, gran-  
desq; calami labori secuturo commodantur.

Tu, Princeps Serenissime, primum hunc A-  
cademiæ Te venerantis cultum, ad manus & ani-  
mum



mum admitte, & devoto tuis laudibus studiorum  
meorum labori, vultu quo Lechicum orbem fe-  
reras, aspira. Neq; enim, hunc tantum littera-  
rum lusum, tuæ amplissimæ dignitati consecra-  
turus venio: verum promptitudinem, venera-  
tionem, animum, ac me totum Tuis Serenissi-  
mis obsequiis, ea qua par est demissione,  
hodie devoveo, ea, qua debeo, con-  
stantia, æternum consecro.



ARA



# ARA SPEI AV- GVSTÆ.

## INSCRIPTIO.

*Gloria parentum, Hereditas filiorum.*

### THESIS.

**T**antum equidem est naturæ in sui propagatione  
studium, ac tam fœlix in successu ingenium, ut pa-  
rensne rerum fœcundior, an artifex mirabilior sit  
asserenda, constare non possit. Illa nimirum, tot  
non annis, at seculis, domum hanc magnam orbis, innumera  
rerum varietate ita complet; ut una in omnibus, omnia conser-  
vet, multa distinguat, singula ad suæ originis deducat simili-  
tudinem. Experiri scilicet videtur, an immortalis esse possit?  
& quasi posset, mortalitatis damna successione restaurat, imò  
mortalitatem ipsam immortalem facit: cùm in alijs præcipi-  
tem, in alijs excirat. Constans est, & perennis in orbe muta-  
tio, ac mundus ipse vix mundus est; certè mundus alter quàm  
fuit, est: inter tot nihilominus iniurias, sensus damni ad mor-  
tales non pervenit, quia hæc, provida commodorum nostro-  
rum parens, quicquid humana fata rapuerint, protinus substi-  
tuit. Agite mortales! tam benefico muneri, gratas preces,  
gratiasq; litate. Iniqvum est non agnoscere beneficium, agni-  
tum autem grato animi cultu non prosequi, criminofum.  
Quotquot Vrbes, Respublicæ, provinciæ, regna, imperia vi-  
gent: naturæ restauratici orbis & humani generis obligantur.  
Quantùm verò tu debes Polonia, cùm Serenissimum Princi-  
pem



pem Sigismundum, Augustissimam Serenissimorum Vladislai IV. & Cæciliæ Renatæ Poloniæ Regum, sobolem, tuis maximis commodis instaurandis augendisq; crescentem vides? Quantum Vilna? cum felicitatem hanc regni maximam, non jam à longè contemplaris, sed eius contactu, aspectum oblectas, & suavissima perfrueris dulcedine. An quæ audita, triumphalia in te gaudia toties concitarunt, ex concessa eorum præsentia, in applausus & lætitiâ non effunderis? Languidius ad animum accedunt, quæ aurium via manant, quàm quæ oculis hauriuntur. Gratulare igitur tuæ, gratulare Reipublicæ fælicitati, pubescentia publica commoda: atq; ut quantum gratulari debeas, scias; quantum sperare debeas, intellige. Accede igitur inprimis, ad hanc ARAM SPEI AVGVSTAE, ac non vana spei tuæ auguria, ex orbis consentientis autoritate cognosce. Et ego quidem, vix animum Academiæ voce in tuas laudes Princeps Serenissime prorumpentem, contine-rem: sed ut maiori apparatu triumphum fælicitatis tuæ agam, proceres ex omni antiquitate advocavi, qui Te ad spes nostras deducerent. Præfero ijs Numinis Opt. Max: de te edictum.

a. *In filiis suis agnoscetur Vir.* Nimirum, quorum vita vivimus, eorum virtutes, in moribus, tanquam in tabella imaginem pingimus: ut in lineamentis filiorum, vultus emineat Parentum.

b. *Scilicet est olim vis rerum in semine certa,  
Et referunt animos singula quæq; patrum.*

Filius imago Patris est. Hinc eloquentissimus Constantini Magni Orator, de filijs coram Parente loquens: c. *Iam, inquit, etiam ductæ lineæ, quibus virtutum tuarum effigies posset includi.* Namq; d. *Rapitur ad similitudinem suorum excellens quæque natura.* &, ut rosæ, non colorem tantummodo, sed etiam virtutem à Parentibus trahunt: ut fructus, non vigorem tantum, verum saporem quoq; ab arbore sumit: ut aquæ, ferreis, argenteis, aureis fontibus conformantur, ita. e. *Omnis natura artificiosa est, & habet quasi vim quandam ac sectam, quam sequatur.*

f. *Non poteris rectum cancris inducere gressum.* Inquit Poëta. Tales omnes sumus, quales ij, per quos sumus. Applaudetur igitur,

a. Eccl. II.

b. Marullus.

c. Nazarius.

d. Idem:

e. Cicero 2. de natura Deorum.

f. Aristophanes



tur, quicunq; rem perspexerit illi, qui posteaquam à Iurispe-  
ritis audivisset, Filium, Personam, Vocem, Corpus, quoq; appellari  
Patris Verè & eruditè g. *Animum esse Patris* asseruit. Congruè  
his Comicus: *Persuade tibi Parentes esse Deos.* Quid ita? An quia  
coniuncta cum Deo manu h. *Animam nobis, decerptam ex mente di-  
vina, & cum nulla alia re, nisi cum Deo comparandam dederunt?* At quic-  
quid hîc operis intervenit, maius homine, & solius Dei est.

i. *An dubium est habitare Deum sub pectore nostro?*

*In cœlumq; redire animas cœlisq; venire?*

A cœlis igitur & Deo *Animam*, à Parentibus autem *Animum* ha-  
bemus, scilicet vim illam & virtutem, qua ad rerum studia im-  
pellimur, easq; complectimur oblatas. Sic, cum à Deo *Ani-  
mam*, à Parentibus vero *Animum* nati acceperint, *Parentes Deos esse*  
quosdam, persuadere sibi debent, quorum ipsi quoq; *Animus*  
sint. Procul hinc ignavæ animæ, vilis turba, mancipia popu-  
laria. Exempla à vobis non derivabo, verum digito tantum o-  
stendam, sequaces parentum nepotes, per terram tota vita ser-  
pere, nec unquam, aut nimis raro, humo assurgere. Magna  
hîc solùm dicenda, imò summa, quia maxima auguror. Itaq;  
k. *Credere debemus, magnos Natales tribuere maiores ad virtutes impetus, &  
in familiis Heroicis vim naturæ præstantiorem esse. Habet enim nobilitas sangui-  
nis & generis, adiunctam plerumq; nobilitatem mentis, estq; magnus ad virtu-  
tem stimulus maiorum virtus, ne quis ab ea degeneret.* Sensit idem dili-  
gentissimus naturæ scrutator, l. & ab antiquitatis laude sæ-  
culorumq; encomijs nobilissimus, qui magnæ fælicitati regis  
cuiusdam Spartani tribuit, quod illi mater fuerat, quæ Regis  
erat filia & uxor: quod nimirum sanguis à tam nobili descen-  
dens origine, quantò plus nobilitatis, tantò plus virtutis  
quoq; veheret.

## APODOSIS ORATORIA.

Et ire igitur jam anime vires tuas, & nûm studio tuo  
**M** respondere, magis autem materiæ dignitatem æ-  
quare sermone poteris, delibera? Ut enim de Si-  
gismundo Principe dignè loquaris, de Vladislao  
Regum

B 2

g. Cælius Rhodig. lib 11.

h. Cicero.

i. Marullus.

k. Francis:

Bal. titulo 3. de Iur. Per.

l. Plinius in Natur.



Regum maximo prius dicendum est, ac tanti Regis & parentis magnitudine, omnia publica, de carissima eius sobole suscepta, explenda. Audivisti Regis tui nomen, venerare Maiestatem, & prostratâ ad pedes eloquentiâ, ueniam sermoni exora. Hic est enim Rex ille, in cuius laudibus, non hominis, sed orbis; nec orbis tantum Sarmatici, at universi desudavit eloquens eruditio: extortaq; vox & confessio omnium oratorum, plus Vladislaum egisse, quàm illi aut dicere, aut excogitare valerent. Et verò, si ex meritorum dignitate laudari deberet, non verbis, sed factis, oratio constaret: neq; scriberetur, sed fieret. Nam si in præterita temporum spatia cogitationes rejiciam, occurrent protinus animo; ingentia bellorum transactionum monumenta, (ô quam difficile verba rebus respondent! dicendum nimirum erat, prodigia,) devicti exercitus, occupatæ provinciæ, triumphati hostes potentissimi, orbis deniq;, quia eius victores, ante Vladislaum prostratus. Coegisse ad pacem petendam Suecum, vidisse supplicem Turcam, duxisse ante currum sub lauro Moscoviam, vix unquam maximis bellatoribus contigit. Hæc verò, quæ in aliorum factis, tam inusitata, tam singularia, tam admirabilia viderentur: si quis in regis nostri encomijs enumeret, vulgaria declamare censetur. Non derogo quicquam Imperatoris tui virtutibus ô Nazari! Verum si id tibi fata concessissent, reperires nunc in Polonia, ante quem, cum omnium applausu & summo veritatis præconio proclamares. *In tuis laudibus id maximum non est, quod in orbe terrarum primum est.* Quid amplius dicam aut quibus assurgam verbis? Succedant orationis inopiæ vota, & quandoquidem gloriæ tuæ amplitudinem Rex Serenissime, tota eloquentiæ capacitas complecti non potest, eâ quàm fortunatissimè ac diutissimè perfrui, ipse tibi par, & tuis laudibus sufficiens. Tibi nimirum hanc divinitatis prærogativam concessam agnoscimus, se ipso frui posse, & apud se invenire, quod orbis non habet. Itane verò, loqui nescio, tacere non potero? Exitus hic sermonis de te destinabatur Rex Invictissime, verum magnarum rerum, etiam compendia magna esse debent. Non audeo itaq; maximo humeros ponderi subijcere, & infinita à te bello gesta non recenseo: at rapit me dulce nomen pacis, & fructus ipse  
sua



suavissimus, quo Respublica universa, tua virtute, tuoq; beneficio abundè est donata. Pax,

*Pax una Triumphis*

*Innumeris potior.*

Bella multi gerunt, pauci pacem merentur, cum tamen omnium bellorum finis, pax publica sanciat. Atq; si præsentium rerum statum, principum molitiones, orbis negotia expendimus, quo nomine congruentiore orbem appellabimus? quàm si illum, ingens bellorum & inexhaustum dixerimus seminarium. Prò! quantùm inter hæc tempora, quæ Poloniam pace gratissimâ oblectant, sanguinis fusum, quanta funera deplorata, quanta urbium & provinciarum ruina transacta. Famosum nomen Cannæ perdidierunt, cum in bellum orbis tractus, non jam camporum, sed suis spatijs, exercitus capere vix potest. Ingemuimus super Germaniam sanguine inundantem, doluimus Hispaniam, tam exterorum, quàm civilium tumultuum mole gravatam, vidimus Galliam, perditis clarissimis ducibus exercitibusq; , justitium parantem. Quid Martis sedem Belgium, suis notissimum cladibus memorem? quid Lusitaniam armis indutam? Italiam furore bellico ardentem, Orientem deniq; ac Occidentem facibus armorum ac animorum succensum? Hoc solum propè deerat, ut Superi, & Poloni, bellis certarent. Dolendum, eheu dolendum! tantum sanguinis effusum Europei, quantum si in barbaros avertissemus, naufragium latrocinij Asiaticis, procul dubio intulisset. Nescio quis infelix Cadmus, ferrea semina per terras dispersit, ea inquam semina, ut ex ipsis cædibus ac mortibus, ferrei viri enascantur. Nec vicisse sufficit ad victoriam, nec victum esse ad belli exitum. Supplet virium defectum furor, virorum contumacia, armorum improba non tam regnandi, quàm regna perdendi cupido. Audis hæc ô carissima patria, an etiam spectas? an verò ad aures tuas, tantus armorum fremitus, tam miserabilis orbis cadentis ploratus, tam infelix præcipitatorum in ruinam regnorum, cum occasu tumultus, non pervenit? Tu ergo illud es fortunatissimum, verèq; beatissimum Regnum, quòd tanta pericula Vladislao auspice, Vladislao parente, Vladislao fortunæ tuæ præside non sentis? te ergo mundi

C

damna



damna non tangunt? in tuo cœlo, nulla prodigia exercituum, nulla spectacula prœliorum, nulla fulmina divinarum humanarumq; irarum versantur? Aut extra orbem, aut supra orbem consistis, atq; si non cœlum, pars quædam cœli altior dici, mereris. Quicquid tamen es, Vladislao debes. Neq; quisquam verbo succenseat, quandoquidem doctissimorum virorum sententiæ, Respublicas cœlos quosdam esse, ex ingenij & veterum monumentis docuerunt: Reges autem & Principes, tanquam numina quædam illis præesse, ad versanda & circumagenda imperia: aut tanquam soles in ijs residere; ad ea illustranda, quæ infra regale solium jacent. Cœli sunt Respublicæ: verum illæ, quæ turbine bellico aguntur, quassantur motibus, vexantur tempestatibus, cœli quidam inferiores sunt: Polonia verò, longæ pacis, & Vladislai Regis beneficio, intacta, placida, serena, cœlum quoddam solare est, cæteris eminentius: nec quidem illis omnibus, Regni maiestate, sed regnantis fœlicitate. Verè sol in cœlo, Vladislaus in folio, omnia illustrat, omnia recreat, omnia fœcundat. Procul hinc periculosa perfidiæ noctes, cœlum hoc plenum sole est: procul ignium fatalium furor, cœlum hoc tumultuosam siderum sedem transcendit.

Quam turpiter Maiestati Imperatoriæ Nero Cæsar illufit, cùm hac gloriæ affectatione, sine meritis raptaretur. Cùm enim pedes, quibus cœlum conscenderet non haberet, manus fabri, pro pedibus sibi substituit, & in arte factis, ideoq; fictis cœlis, locum quem illi faber, tanquam maximus Deorum assignaverat, occupavit. Quis intueri potuit illud portentum naturæ & Romæ, ac risum sustinere? aut quis te Vladislai Rex invictissime, nostro cœlo præidentem cogitare, & animi satis ad stuporem invenire? Nam tu quidem, cœlos ambitiosè non affectas, sed mereris gloriosè: & cùm illud supernum summumq; , tibi à cœlitibus paratur: tu quoq; in terris cœlos facis, cùm imperium tuæ potestati subiectum, ad cœlestium orbium imitationem, tranquilla gubernatione conformas. Nunc itaq; demum exclamare licet. O beatam Polonæ Reipublicæ sortem! ô fortunatos felicitatis nostræ progressus! Quantum enim ex hac tam ingenti Vladislai Regis gloria, de tua virtute,  
magni-



magnitudine, felicitate, promittere in posterum ausim Poloniae, Sigismunde Princeps Serenissime. Magnus es o Princeps, & jam inde magnus es, cum adhuc parvus ætate sis. Tua enim quoque sunt hæc decora quæ numeravi, tuæ laudes quas dixi, tua dignitas quam suspexi. Successisti in opulentissimam hæreditatem gloriæ ac virtutis, ad quam te Serenissimus Parens admisit, ut plus in cunis dignitatis reperires, quam multi principes, omni laborum suorum ac vitæ decursu meruerunt. Quis non credat, si tales Dij essent, quales olim crediti, Martem ipsum incunabula tua ambiturum fuisse, quæ tot galeis victricibus, tot scutis, tot laureis, tot trophæis undique cingebantur? quis dubitet, Iovem quoque, si Rex Deorum illorum, in quibus nihil non humanum erat, censeri voluisset, tibi substratam purpuram, desideraturum fuisse? in qua tam ingens triumphorum cumulus, encomiorum acervus, gloriæ dos, & thesaurus involuebatur. O quis Superum aspectibus nostris hanc beatitudinem concessisset! ut cum creator ac opifex animorum Deus, Iagiellonios illos Spiritus, ac maxime Vladislai Regis & Parentis maximi, sinu tuo includebat, spectare liceret. At quod oculis non est datum, animo eripi non potuit. Intuemur & veneramur transfusam in te maiorum tuorum magnimitatem, fortitudinem, anhelum ad sublimia spiritum, & quidquid denique tot sæcula in Iagiellonibus suspexerunt, quicquid in Vladislao Rege Parente tuo, præsens ætas laudat, subsequens mirabitur. Et hæc ego cum loquor, non tantum omnia quæ de te dicenda occurrunt non recenseo, verum magna parte, spei nostra auspicia non attingo. An enim inter hæc revocavi, sceptræ, Diademata, aquilas, imperia Austriacæ? quæ tibi nascenti, glorioso adstiterunt famulatio, cum Serenissimæ Reginae nostræ, Cæcilie Renatæ Austriacæ, magnæ Imperatorum filie, Sorori, nepoti adessent. Sine me, Ferdinande Secunde, olim terris nunc cælis Augustissime Imperator, sine obsecro aliquid non de te; humanas enim laudes excessisti, sed coram te proloqui. Quis tuus tum sensus, quæ apud superos pro carissimo nepote vota fuere, ut tantus ac talis nasceretur, quanti ac quales, Iagiellones & Austriaci imperassent, imperarentque: Quoniam verò ille eras, cum inter nos versareris, ut nihil à cælis posceres,



quod non acciperes, quis universa decora virtutum oratione percenseat? quæ dulcissimo infanti è sinu numinis contulisti. Vitam accipere, humanum erat: ad sceptrum, ad honores, ad thronos, ad regimen Populorum, salutem gentium, tutamen orbis parem nasci, hoc Principem Iagiellonium & Austriacum, hoc Ferdinandi Secundi Imperatoris, & Sigismundi Serenissimi Poloniæ Regis, nepotem; hoc Vladislai IV. & Cæcilie Renatæ Serenissimorum Poloniæ Regum filium, decebat. Non igitur minor animo, summis dignitatibus lucem primam aspexit, sed ipsam diei illius claritatem fulgore natalium illustravit: accendit ignibus mitrarum sidera, æmulatus est splendore paterno lumen solis, & quod summum pondus habet, ea sequentis vitæ præsidia, eaq; virtutis munimenta secum attulit: quæ omnis ætatis ac posteritatis commodis sufficerent. Illi in mundum miseri prodeant, ac à Thracibus deplorentur, qui nudi, inermes, omni præsidio derivatæ in se virtutis destituti, prodeunt: cum tuo Serenissime Princeps Natali, animi hominum, spes ac fortuna est renata, ut in Serenissima Cæcilia Renata semel renati, te nascente iterum nasceremur. Iam nunc de suo Philippus Macedo gaudeat leone, jam fulmen suum Olympias minetur, jam solem exorientem Roma suspiciat: nos in te non Leonis, sed Vladislai Iagiellonis & Rudolphi primi fortitudinem; non fulminis, sed Vladislai Varmensis, Alberti primi Austriaci, ac Caroli Quinti vim; non solis, sed Casimiri Principis Sancti cœlestes, Casimiri Magni, Alberti Secundi Austriaci, aliorumq; Regum ac Imperatorum humanos, ut auguramur, ita spectabimus honores. Hos ego, nunc quoq; in tuo Serenissimo aduentu præsentem suspicio, hos veneror, his applaudo.

*Q*uid pigras trahimus moras?  
Quin plausus resonos damus?

*Venit nobilior dies;*

*Et lux nobilior die;*

*Fulgens Principis igne.*

*Heu Musa, Cytharam peto!*

*Sed doctam cytharam date.*

*Ipsæ stamina tendite,*

*Et sint*



Et sint aurea stamina,  
    Nostra congrua laudi.  
Grandis materies modos,  
Vulgaris superat Lyra:  
Nil! o nil, popularibus  
Dicendum leue barbitis  
    Hoc in munere laudis.  
Magna est gloria Principum,  
Hæc est gloria Principum:  
Maior gloria Cæsarum,  
Hæc est gloria Cæsarum:  
    Vno pectore clausa.  
Princeps sit tener, est tamen  
Princeps non Puer: aut puer  
Si dici patitur, puer  
Princeps Regius est. viro  
    Sic maior puer omni.  
O fons sanguinis aurei!  
Virtutis Pater inclitæ.  
Quam magnum decus aduebis,  
Alta vectus origine  
    Claro fulmine laudum.  
Non pulvis vitiat levis,  
Puri gurgitis alueum:  
At fundus micat aureus,  
Et litus pretiosus  
    Gemmarum ardet in auro.  
Hoc fulgor diadematum  
Exultat radiantium,  
Hoc solo nitet, omnium  
Orbis gloria Principum, &  
    Summi, frontis honores.  
O quæ secula Principi  
Laudum se comites volunt!



*Et quæ sæcula Principis  
Laudum materiem ferent.*

*Tant pondere pressam?*

*Aude Vilna. Perennibus  
Portas cingito laureis,  
Magni Littalidum Duces  
Intrant menia, quos tuus  
Princeps restituit tibi.*

*O Regum facies graves!  
O pompam superis parem!  
Hinc fagiellonidum nitor,  
Atq; hinc Austriadum decus  
Sese ostentat in ostro.*

*Vnus tot revehit Duces,  
Vnus tot revehit dies:  
Vnus tot superet Duces,  
Vnus tot superet dies,  
Ævo, ac laudibus Hospes.*

## ARA SPEI SACRÆ.

*Inscriptio.*

EX NOMINE OMEN.

THE SIS.

**C**um à rebus ad nomina accedo, à serijs ad ludicra  
progredi, cuiuspiam fortassis videbor. At cogitet ille  
velim, nihil in auspicijs Principis nostri ludicrum,  
nihil leve, nihil deniq; mediocre reperiri. Vulgaris  
conditionis exiguitas, æstimationem hanc rerum patitur:  
virtus autem illa, quæ plus quam ab hominibus, nam ab ijs qui  
supra homines eminebant, in pectus descendit: & fortuna illa,  
quæ fastigia altissima olim occupavit, sortem atq; iudicia populi  
effugit. Quicquid igitur de Principe nostro cogitaverimus,



mus, magnum esse debet, ac plurimis spei auxilijs firmatum. Ita, Principis Nomen, Omen publicæ fælicitatis est, atq; hic quoq; , Spes & Res. Et quanquam, sufficeret meæ mihi materiæ, ad beata seculorum præfagia ab hac ara depromenda fælicitas, non tamen invito Apollinè oracula pandam, donec ille, omnia ex nomine rectè sumi assentiatur.

Ecce verò offert se sub uno nomine exercitus integer, (diceres unum hominem) unus tamen sanguis, una gens. e. Fabiorum. En purpuratam cohortem! Senatores in sago, Duces sub militaribus signis, Principes urbis Romanæ, non pecuniæ, sed amoris in patriam & immortalitatis stipendiarios! Hi, uno animo eoq; maximo, bellum patriæ in se averterunt, merueruntq; pro illa in acie cæsi, ut, quando Fabiorum domus, urbis munimentum extitit, Roma, Fabijs pro monimento esset. Reservavit autem natura sibi unicum Fabium, in quem spiritus occisorum transfudit: ut deinceps, tres continui senatus Principes, dignitatem maiorum, pari virtute, eodem nomine referrent.

Nonnè pariter, duo Bruti libertatem Romanam asseruerunt, cum tres Horatij, imperium occisis in acie Curiatij meruissent? Nonnè Horatius Cocles, unus exercitum Porsennæ sustinuit, ut decora urbis à maioribus parta conservaret? Nonnè idem nomen, Decemviris Rempublicam imperio gravi prementibus oppositum? cum Horatius item f. *Illos decem Tarquinius appellavit, admonuitq; , cum Valerio Publicolæ Nepotè, Horatij & Valerij ducibus, Reges esse pulsos.*

Pulcherrimū igitur censeo, g. Probo deinde ad imperatoriā dignitatem evecto, à Valentiniano datū elogium, quod *Vir* esset *sui nominis* & Clotario, à Gregorio Turonensi. h. quod *sui nominis executor*. Diserte etiam, Theodoricus Rex suo Fælici. i. *sumpsisti nomen ex meritis, custodi ut semper lateris veritate vocabuli*. Alexander quoq; Macedo in oppugnatione Tyri, conspicatus cognominem suum, segnius fortassis agentem k. *Animose clamabat ô commilito. Fac facinus, nomine quod geris dignum*. Audeat igitur quispiam negare, at ego cum Alexandro altero, eoq; Romano

D 2

decer-

e. Livi. & Flor.

f. Livius. dec.

g. Cornel. à Lap. in Penateu.

g. Vopiscus.

h. lib. 10. c. 28.

i. Cassiod. lib. 8.

k. Plutar in Alex.



decerno. l. *Nomina insignia, esse onerosa, quod m. Nomen auspiciū rei sit, & n. Fides nominum, salus proprietatum. o. Hinc, per Nomen non raro rei sumus, cum p. Nominis Sacramentum non custodimus. aut etiam q. Recusamus nomen, tanquam iudicem suspectum: aut r. Factis appellationem impugnamus, & calumnia afficimus. Diadumænus quidem Imperio & Antoninorum nomine donatus, spem militum, nominis conservandi studio, sustinuit. s. Elaborabo, inquiens, ne desim nomini Antoninorum. Scio enim me Pij, me Marci, me Veri suscepisse nomen. Pareo quapropter spei nostræ ad aures insusurranti: pareo, & quid narret, quid Poloniæ à Sigismundo Principe promittat, enarro. t. Fauste rem auspicatur, qui pulchro nomine prælagit eventum. Plane in Rem & Spem nostram sacrarum literarum interpretes. g. Deus & Hæbrei, suis nomina ab eventu imposuerunt: & tunc nomina, erant quasi omnia.*

At Poloni nullis magis quam Principum suorum Nominibus, omnia sua includere. Et quia gens ad libertatem & gloriam nata, ad hæc vitæ decora maxime aspirat: ab his quoque nomina petit. Quid enim Miecislai nomen indicat? præterquam laudis propagationem, bellicosam gentem dignam, gladio Principis quærendam. Quid Boleslai vocabulum monet? nisi non finendum Principi, ut fama sua, aut publica; ignavia, quasi ægritudine quadam & dolore, conficiatur. Quid Vladislai etiam gloria auguratur? Scilicet in Principum dextris, sitam cum gloria fortunam, quam ipsi comprehendere virtute, comprehensamque retinere possent. Reliqua tanquam superflua in catalogum non adduco, simul autem, Poloni animi genium laudis cupidissimum admirabundus adoro.

## APODOSIS ORATORIA.

**H**orum felicitas. h. *Tantum de te expectat, quantum nomine polliceris, Sigismunde Princeps Serenissime, felix meta spei, ac votorum nostrorum. Sigismundum te ego suspicio, Sigismundum veneror, Sigismundi nomen ingentibus argumentis spei gloriosum, coram orbe procla-*

- |              |                     |                           |                   |
|--------------|---------------------|---------------------------|-------------------|
| l. In Alex.  | m. Cassiod. lib. 5. | n. Tertullian.            | o. Salvia lib. 3. |
| p. Tertulli. | q. Idem.            | r. Basil, Selec. Orat. 9. | s. Sandæ in Ped.  |
|              | Acad. Christia.     | t. Celad.                 | h. Nazar.         |



proclamo. Viderit Carthago novennem Annibalem, ante penates patrios in Romanam perniciem jurantem, viderit & stupuerit; ego verò te ante aras publicæ spei, maiori dignitate augustiori; animo, bellum contra improbitatem suscipientem intueor, & in hac triennali tua ætate, quæ prima, primis Inuictissimi parentis tui, trium maximorum hostium devictorum annis respondet: triumphos pietatis inclusos contemplor. Quid enim potius Sigismundus Poloniæ spondeat, quam fore, ut redivivam Serenissimorum eius nominis regum pietatem, iterum in se, suspiciat mundus. Et verò, prima hæc, princeps; est, expectatio populorum, à qua, illi vota sua auspiciantur, & cui veluti basi nixi, tantum sibi de Principe pollicentur, quantos hic progressus ostenderit. Nam si in hoc gradu cespitet, primum ad Deum, cuius nutu stant ruuntq; principatus, non perveniet: tum procul dubio, à communi Reipublicæ fælicitate aberrabit. Sit enim quisq; si tamen esse potest; privatæ fortunæ faber: publicam nemo, nisi Deus extruet. Pietas igitur, & animi intemeratus candor, est Dei & Principis vinculum, inter cœlos terrasq;, susceptæ concordie tessera, humani supernique auxilij nexus, mortalium patrona, artium propugnaculum, urbium tutamen, imperiorum murus, orbis universi fulcrum. Hæc, bella gerit sine expensis, committit prælia sine damno, fundit acies sine vulnere, expugnat mœnia sine lassitudine, vincit sine periculo, triumphat sine præsidij, imperat sine metu. Hæc cœlites hominum socios facit, hæc auxilia ab astris ducit, hæc fulmina pro telis jacit, hæc, fidelis amica, comes, miles, Dux, bonorum gaudet censerî Principum. Ter vero nos fælices, qui terna damna piissimorum Sigismundorum, in Sigismundo Principe resarciri videmus. Intelligant universi, quam non ex vano augurer! An enim eventu quopiam fortuito contigisse dicemus, aut potius divinæ scientiæ providentia factum asseremus, ut dies ille, qui Sigismundum Primum, immortalî vita dignissimum, ex hac mortalitate evocavit, natalis Principis nostri existeret? Nihil hic egit casus, nihil valuit fortuna. Damna nostra à superis pensari cæpta sunt: & ne Sigismundum tantopere desideraremus, commodis cum Principis ætate cre-



scientibus provisum. Gratias vobis pro hac Reipublicæ cura ô Superi! Favete ut cæpistis! Tum enim nostri curam vobis non excidisse ostenderis, si cum Principe nata solatia, integra diuturnaq; servaveritis. Mortuum Sigismundum illum vix credimus, cùm hunc natum intuemur: quasi tumulus, in cunas à Principe mutatus, immortalem fore semperque nascentem nostrum Principem, sponderet. Igitur læticia illa, qua natalem tuum Sigismunde Princeps recolemus, applausus quibus prosequemur, triumphus quibus exornabimus, tuam pariter, illiusq; gloriam referent: & nostrum in te amorem, in eum autem pietatem testabuntur. In oleam natalem, fatalis abibit cupressus: vigor autem ille, Sigismundianæ virtutis, quem conservandum fama ante urnam exceperat, frondes ferti genialis animabit: quia hæcenus quidem, Regis maximi gloriam, nostræ memoriæ tutela fovit: ab hinc autem in te vivet. Duo nobis munera cœlites, simul tuo beneficio exhibent, ut & præterita sæcula quodammodo convertantur, & futurorum solatia temporum, in te præsententur. Sigismundum Sigismunde refers, illum inquam Sigismundum, qui tam admirabili prudentia regni clavum administravit, & tanta gloria pietatis & virtutis per orbem ferebatur, ut Solimanus quoque Turcarum Imperator, eum a. *Patrem suum, ac Regum* appellaret. Spectatur quoq; pariter in spei tuæ auspicijs, Sigismundus Secundus, verè re, ut nomine Augustus. Sensit enim in hoc filio, non degeneres à parente spiritus Polonia, cùm summa sælicitate, eaq; virtuti obsequente, non modo tueretur commissum, sed proferret invictum imperium. Quo verò quam pio, quàm ingenti pietatem coleret animo, sæpe quidem patuit; at tum clarissime, quando iudex sacrarum de religione causarum in comitijs dictus, in vocem Principum memoriâ dignissimam erupit. *Rex ego non pastor.* Adiunges his, pietatis imitatione expressum, Sigismundum Tertium, avum tuum Serenissimum, tantoq; facilius sanctitatem eius ad te derivabis, quantò, tempore propinquior est. Boni cœlites! quàm ego repente lapsu quodam sermonis (Sigismundi enim Augusti laudibus insistere statueram) in hunc regem, non tam nostrum, quam vestrum incidi. Huius vitæ spatia, pietate non temporibus definita.  
sunt



sunt. Nondum primum ætatis emensus fuerat stadium, & jam adeo superos sibi devinxerat, ut pro famulatio, eorum opera, uteretur. Norunt qui viderunt, novimus qui certa fide accepimus, noscent denique & jam cognoscant posteris: cum acies ad Sigismundum inter ea juvenem occidendum, à Principe expedita iret, cœleste quoddam numen gladio vibrato itineris transitum occupasse, necemque, sicariis si pergerent minatum, monito hoc superaddito. *Irent ad Principem suum, ac ut à necis molimine animum averteret, cum monerent. Sigismundi tutelam superos gerere, nec unquam, ab eo potissimum tempore, illum deserturos.* Certavit porro ille, toto deinceps vitæ spatio, grata liberalitatis æmulatione cum superis, ut cui vitam deberet, ipso vitæ genere palam faceret. Vos ego testor sacratæ cœlitum aræ, vos sana divorum, Maiestate pariter, ac multitudine gloriosa, vos potissimum Vilnensia eius in D. Casimirum pietatis monumenta. Errent sane cæteri, qui marmorum fidei perpetuitatem suam committunt. Nam neque, ipsa æternum stant, & cum longissimo ævo steterint, quærere adhuc licet, ambitione, an virtus erexerit? Sigismundus tamen, non erravit. Animata enim, in Divorum effigies marmora, coactaque ad obsequium sacrum saxa, non laudes tantum authoris prædicant, sed referunt etiam pietatem: ex qua, magis quam ex suo corpore constant. Hæc qui cogitant, qui suspiciunt, qui laudant, cum ad te Sigismunde Princeps mentem convertunt, an alium te cogitare, aliumque dicere possunt? quam ter Sigismundum, id est, piissimum, religiosissimum, sanctissimum. Habes verò & paterna maternaque ingentis pietatis exempla, tibi ad imitandum proposita: eaque tot ac tanta, ut augustum illud palatium, quod te nascentem excepit, Templum regalis sanctitatis, non palatium dicendum, merito existimem. Constitue in mente tua, quæ etsi nondum alias cogitationes præ tenera indole, capere potest. Deum tamen capit; amplissimum hoc imperij Lechici universum, in quo nulla eius pars, nullus locus, à piissimorum Regum, piissimis exemplis alienus occurret. Hinc quicumque beatissimo regni pacifici spectaculo, longiori mora contemplantis animi intersunt, non pacis tantum imagine; sed et pietatis mentem oblectant: atque ad Vladislaum, Serenissimum parentem



tuum converſi, illum intuentur, illum prædicant, illum non humanis, ſed divinis quoque laudibus attollunt. Iaceat ignava improbitas triumphalibus calcata pedibus, jaceat ſcelus, jaceat impietas: ſurgat autem pietas, vigeat pietas, creſcat pietas, triumphet pietas, & piſſimus ac religioſiſſimus, cum ſanctiſſima conſorte ſua, Rex noſter, Parens tuus Vladislaus. Ecce verò per merita Sereniſſimæ Reginæ, ad Auſtriacæ quoq; pietatis mentionem perveni: tibi Princeps Sereniſſime cognatam, & ſpei noſtræ auſpicijs fæcundam. At nihil amplius dicam, poſteaquam Auſtriacam nominavi. Omnia enim ſanctitatis vocabula, hoc ſolo nomine continentur, & non Oratoris, ſed Oratorum eſt, dicere quid ſit eſſe Auſtriacum. Plus ab hac domo pietatis, quam ſanguinis in poſteros derivatur, atq; à pueritia prima, uberibus non tam nutricum, quam Chriſti aluntur. Ita natus Princeps, ita creſces, ita vives: ita ad eam, quâ Sigismundi noſtri perfruuntur gloriam pervenies: ut cum Sigismundos, in te expreſſos, reddideris, *Sigismundus*, id eſt, *Muſis dignus* habearis. Quanquam enim litteræ, in omnium obſequia officioſæ, aut ſunt, aut eſſe videntur (nam eſſe, non niſi in laudibus meritorum debent) nihilominus, nemo encomijs erudit, materiem digniorem præbet, quam ille, qui ad aras pietatis, ſua opera conſecravit. A ſuperis enim ſuam originem litteræ trahunt, & è cerebro Iovis cum Pallade genitæ, ut primordia, ita incrementa ad eoſdem referunt. Laus vera cenſeri nequit, quæ argumenta ſua, cœlo non probavit. Quid ſi ad ſpem promiſſæ in te fælicitatis, calami aſſurrexerunt: quæ tandem ad maturiora encomia eriget ſe æmulatio? aut qua contentione gloriæ, laus tua prædicabitur. Intuere jam nunc, Academiam Vilnenſem, ad tuæ ſacræ manus oſcula adruentem, intuere nobiliſſimorum ingeniorum induſtriā, tuis laudibus ſe erudientem, & venerationem ſemper tuæ dignitati impendendam, hodie devotam agnoſce. Laborent enim alij ut laudes mereantur, alij ut meritis referant: te & meritum in tuis maioribus fatemur, & Vniverſitatem laudum, cum Vniverſitate litterarum, unâ tibi conſecramus. Crede autem Princeps. Non minor gloria venit a calamis, quam à gladijs; & ſi nobis non credis, illi crede, qui victorijs orbe peragrato, victum ſe ab Achille inge-



le ingemuit, quod Achilles encomiaſten Homerum invenisset, ipse neminem mereretur. Procul verò æternum à tua fortunâ hæ querelæ.

**O**rbis amor Princeps! terrarum Sidus amicum,  
Unica spes nostri delictumq; soli.  
Ferre tuas laudes quæ possit carmine Musa?  
Quæ tamen in laudes nollit abire tuas!  
Lis homines versat, potius venerentur amentne?  
De te, Amor & Cultus, pulchra duella gerunt.  
At meritis laudum, felicia fœdera pangis,  
Ut concors animus, quod veneratur, amet.  
Quid dubitem? timide mentis discedite curæ,  
Obsequiosa meæ currite fila manus.  
Currite, non satis est tardo procedere gressu,  
Immenso patuit, gloria pansa sinu,  
Ecce etenim, ad voces vastus sua brachia mundus  
Expedi, impatiens vincula ferre maris.  
Impulsa aufugiunt cognatis sedibus unde,  
Ac submota suis æquora littoribus.  
Scilicet auspiciis Princeps Auguste Secundis,  
Laudi, magna tue Fama theatra parat.  
Ibis per summi calcata cacumina cæli,  
Ibis io, fausto per iuga summa pede.  
Altior & cælis, & terris amplior, omnes  
Sigismundano mensus honore gradus.  
Et neq; mortalis splendor comitatur euntem,  
Sed comites superi sunt, superiq; Duces.  
Dux præt, illustri vultu Regina polorum  
Religio, & Pietas concomitata Fidem.  
Sacra cohors, Sociæ cælestes, turma fœelis,  
Terrigenumq; decus, Cœlicolumq; decus.  
Visa cano. Sacros cum Phæbus conderet igne,  
Pelleret & totum nox inimica diem.



*Semita candenti micuit per sidera luce,  
 Succensaq; simul dimicuere faces.  
 At super Arctoi stabat capita alta Bootis,  
 Aurea descriptis sculpta columna notis.  
 Hoc iter, hæc sobolem Vladislai semita ducet,  
 Sigismunde umbras non patiere nigras.  
 Perge memor proavum sacros reparare triumphos  
 Sunt potiora alto, fixa trophea polo.  
 Credite, non sensus fallit, neq; perfida lusi  
 Auris, at in sano pectore, verba sedent.  
 Ter data vox cælo, Regnis vox nota Polonis  
 Augusto Regum mortua ab ore venit.  
 Chare nepos atavum, magni laus magna parentis  
 Vive diu, & felix ardua calce preme.  
 Sidereas patriâ pietate merebere laudes,  
 Ter Sismunde solo, ter venerande polo.  
 Eueniet, votis succedant gaudia certis  
 Quæ venit axe fides, indubitata venit.*

## ARA SPEI FORTVNATÆ

INSCRIPTIO.

*Indoles bona, vates optimus.*

THESIS.

**H**Actenus aut è longinquo, aut ex occulto, Spes no-  
 stras prospiciebamus. Ecce jam feliciori aspectu  
 beamur, ecce coruscis emicant fulgoribus, & se  
 spectandas in aperto præbent. Quemadmodum e-  
 nim arborum fructus immaturi, etsi gustum non perficiunt;  
 colore tamen ipso, & ductis quibusdam bonitatis suæ in corti-  
 ce lineamentis, ad quem maturefcant saporem ostendunt: aut  
 quemadmodum auri, argentiq; facunda tellus, pretiosum  
 quidem illum partum, splendore non prodit; nihilominus, si-  
 gna &



gna & indicia latentis opulentiae in venis disponit: ita nobiles  
 & ingenui animi, quamquam inclusam intra se virtutem, in  
 publicum non promunt: in factis tamen, verbis, atq; ipso vul-  
 tu, operum praesagia maturiorum praeseferunt. Mecum decer-  
 nit laudatissimus Orator. a. *Ita intimos mentis affectus, proditor vultus*  
*enunciat, ut in specula frontium, imago extet animorum.* Neruosè & do-  
 ctè Magister eloquentiae. b. *Generosae arboris planta, statim cum*  
*fructu est.* Hic tamen fructus, spes solaspascit. c. *Hinc Brachma-*  
*nes edito infante, ex membris cuius esset indolis diiudicabant.* At Sapiens  
 orbis, d. *Indolem, igniculos naturales, & quaedam veluti seminaria virtutum*  
*dixit.* Isocrates verò, e. *Pueros felicitis indolis, Deorum filios nuncupavit.*  
 Vtor in primis exemplo Alexandri Macedonum Regis. Hic  
 Puer admodum, cum Persarum Legati ad parentem venissent,  
 quantum animum in tenero corpore servaret, magnificè prodi-  
 dit: cum inter quaestiones allatas, nihil ab ijs de aureo arbus-  
 to, nihil de hortis pensilibus, nihil de Regis cultu interrogavit: at  
 quasi bellum protinus illaturus, quantae Persarum copiae, quae  
 viae ad superiores regni provincias contendenti, à mari compen-  
 diosissimae, qui modus illis pugnandi, quem locum Rex in acie  
 teneret, tanta diligentia requisivit; ut admirati Persae indolem,  
 dixerint, f. *Puer hic est Rex magnus, noster autem opulentus.* g. The-  
 mistocles à praeceptore suo, pueri indolem diligentius penetrante,  
 sapientius admonebatur. *Tu mi puer, nihil mediocre eris, sed omnino vel*  
*magnum patriae lumen, vel magna pestis.* Marius septies Romanus Con-  
 sul, h. cum puer adhuc, gravissimis viris inter caenam de re-  
 publica differentibus adesset, atque inter multa, Scipio interro-  
 garetur. Quem egregium Imperatorem respublica habitura  
 esset! respondit. *Vel hunc, digito Marium ostentans, & ingeni-*  
*um eius summis rebus aptum pernosces.* Quid ille liber spiri-  
 tus Cassij, quam aperte in pueritia se prodidit?

Gloriabatur Faustus puer, L. Syllae filius, de parentis sui  
 Monarchia coram coetaneis, inter quos Cassius aderat. Non  
 tulit igitur adversum Romanae libertati, servitutis nomen Cas-  
 sius, gloriantemque colapho petijt, ac coram Pompeio accu-

F 2

satus.

a. Latinus Pacatus

b. Quintilian

c. Alex. ab Alex. lib. 2. cap. 25.

d. Plato.

e. Isocrates.

f. Plutar. in eius vita.

g. Plutar.

h. Eutropius lib. 5.



satus. Dic inquit item Fauste parentem Monarcham, & ego rursus libertatis violata pœnas à te repetam: ut jam tum appareret, non defuturū illi animum ad Cæsarem dictatorem interficiendum. Verissimè Lælius. i. *Multis signis natura declarat, quid velit, ac quærat, ac desideret.* Carolus V. Galliarum Rex, k. Filio suo Carolo VI. explorandæ indolis causa, coronam auream galeamque porrexit, quàm cum ille relicto diademate arripuisset, specimen militaris indolis prodidit.

Longè verò pulcherrimum, domesticum Boleslai III. Vladislai Secundi Regis Poloniæ filij, extat exemplum. Nonum ætatis annum apud parentem agebat, cum Secechus Palatinus Cracoviensis, contra Moravos mitteretur. Non tulit ardor pueri militaris, domesticam veluti ignaviam, genuaq; patris ac collum amplexus, multis lachryinis exoravit, ut in castra abiret. Vbi verò ad exercitum ventum est, puer versari in ordine, omnibus arridere, æstum imbresq; pati, cubare humi, obire vigilias, cæteraque onera castrensia præter ætatem facere ferreq; ut indoles illa studiumq; pueri, futuram eius magnitudinem, non obscure portenderet.

Verum nisi indolem, recta firmet institutio, facile homo à se ipso deficit, & naturam moribus mutat.

Hic igitur Rhodus, hic saltus: ut bene nati bene vivant; bene illos educare. Hinc Poeta. m. *Ut quisque filium suum vult esse, ita est.* Quanquam enim. n. *Anima bene nati præceptis cbrvians, magis à seipsa quam à Magistris adiuvatur.* Et o. *Quemadmodum Dii immortales nullam didicere virtutem cum omni editi: atq; pars naturæ eorum est, esse bonos: ita quidam ex hominibus, egregiam sortiti indolem, in ea quæ tradi solent, perveniunt sine longo Magisterio: nihilominus magna hic opus diligentia.* Nam. p. *à magnis ingeniis, ut magnæ virtutes, ita etiam magna vitia præciscuntur.* Quod si privatis etiam, hoc studium non negligendū, & tanquam publicum tractandū, quod q. *Civitas talis futura sit, qualis adolescentum educatio, quanta vigilantia ac prudentia requiratur, in instituendo Principe? qui nunquam sibi soli bonus, aut malus est: sed qualis ille fuerit, taliter agi cum republica oportet. Principum Magistri, Rerum publicarum artifices sunt, quæ suis principibus, vel suapte, vel invitè conformantur.*

APO-

i. Cicero.

k. Theatrum vitæ.

l. Crom. lib. 5.

m. Terentius

n. Philo.

o. Senec. ep. 9.

p. Plutar.

q. Natalis.



## APODOSIS ORATORIA.

**V**erum ego, nec inter aulas uersor, nec Principem erudio: at illa tantummodo loquor, quæ in Principe Sigismundo certa, certam quoq; magnitudinis eius spem nobis faciunt. Nam quæ in Te, quam augusta emicat indoles, exultantium sua sponte, Dux fortunatissima animorum? Difficile quidem uidetur, ex tam tenera & triennali ætate præfagia legere: uerum excellens hoc tuum, & Principe dignum ingenium, sic quoq; se prodit, & jam publico gaudet. Otho Imperator, cui deinde magni nomen inditum, nullum maius, ætatis secuturæ specimen in pueritia edidisse legitur, quam insignem hilaritatem, à qua inter ipsa prope crepundia, *Orbis amor* dici meruit. Rapis nos in similes affectus, & præconia, Sigismunde Princeps, & suauissimis tui animi, vultus, morum delicijs; non ab invito animo, confessionem hanc tibi honorificam, nobis gratam, omnibus temporibus ac seculis fortunatam extorques, ut te, *Amorem orbis*, cum Vniuersi, tum Poloni consalutem. Amant omnes Magnam Magni Vladislai prolem, amant crescens regni decus, amant assurgentem Septentrionis gloriam: et cum id amant, tum iucundissimis hilaritatis tuæ invitamentis, ad maiorem tui amorem pelliciuntur, imò ad perennem provocantur. Allicis affectus intuitu, derines gratia, imples & perficis suauitate: ut in hoc tuo flore, maturum illud Principum optimorum præscriptum impleas. *A Principis vultu, non debere ullum iristem abire.* Hoc dicunt, quicunq; te aspexerunt; hoc sentiunt, quicunq; te intueri desiderant. Nam quid illud augustum & frequens, Procerum tui inuisendi desiderium? quid frequentes in tuis sanctissimis claustris conventus? quid tam crebræ Magnatum salutationes volunt? nisi spes suas è propinquo oculis libare, & à tuæ præsentiae dulcedine, nobilem animorum petere oblectationem. Quis igitur est, qui ad augustum Serenissimi Regis conspectum admissus, tuum simul non petat: ut quod in Inuictissimo Rege venerabundus admiratur, hoc in te amet. Quis est, qui supplices preces ante eius clementiam deponat, quin pro summo gratiæ regiæ cumulo, tui aspectum exoret? quod nullus, tantum gaudeat



deat, sibi aliquid concessum, quantum, te Reipublicæ datum gaudet. Quis est, qui Serenissimæ Maiestatis triumphales manus, placidissimam Polonæ felicitatis sedem, osculo veneretur? quin simul idem obsequium tibi humiliter deferat: ut quemadmodum in illis præsentium seculorum, ita in tuis, nascentium prosperitatem, suavissimè debasiet. At tu ita humaniter suscipis adventantes, ita graviter salutas, ut non in palatiorum, sed in orbis medio constituti, Principem affabilitate gratissimum, Maiestate venerandum, intueri se existiment. Delectat igitur te suspicere, delectat à facie tua pendere, ac nō ad Principem tantum, sed ad delicias itur. Oculorum tuorū gemmæ, radijs gloriæ scintillantes, frontis amænissima planities, nitoris specie conspicua, genarum purpureum decus, auroræ rosarumq; æmulum, non magis spectabilem, quàm amabilem te reddunt: dignissimumq; non brachiorum, sed animorum complexu. Nemo igitur in tuo vultu oculos figit, quin animo in invictissimi Regis hæreat consideratione, atq; in publica encomia erumpat. O Vladislæ non terris tantum, sed etiam cœlis carissime: quo tandem animo tibi hunc superum gratulemur favorem! quem cum mereris, nos quoq; beatos facis. Neq; enim Regum conditio singularis est, verum sive adversis, sive prosperis utatur fatis, ad universos pertingit. Domuisti barbaros, non huic tantum regno, sed universæ Christianitati formidandos, alios armis, alios terrore, hos juxta & illos admirabili virtute: vindicasti Rempublicam infestantium periculorum metu: donasti Patriæ, diu vanis imploratam votis pacem: implevisti orbis spacia imensis gloriæ monumentis: at unum tibi, unum nobis optandum erat, ut gloriam tuam non memoria tantum constanti, verum etiam viva Sobolis augustæ expressione, perennares. Respexerunt, demum Superi ad omnium desideria, respexerunt ad publica vota, respexerunt ad tua merita: & Sigismundum dedere Principem, qui te, nobis ac posteris referret. Altius te ceteris Principibus, primum quidem regalis thronus, tum non Regum, sed virtutis comes fortuna extulit: multum tamen, ad perfectam successuum felicissimorum prosperitatem defuisset: si posteaquam nobis vixisti, posteris non viveres. Nam lex lata, æternumq; duratura: ut  
vos,



vos, quos ingentia virtutis facta, mortales esse non sinunt, ad immortalitatem è mundo transmigratis: illam tamen, quæ humanis oculis non cernitur. Et quanquam memoria superstes, vitæ munus explet: est tamen quoddam vivendi genus beatius, & quasi animata gloria, in prole sua superesse. An verò aliter cogitare audebimus de Sigismundo III. beata illa perennis vitæ spatia jam emenso, nisi quod ille ab alto in terras prospectans, non omnino à nobis abesse videtur; quibus tu, Maiestate ac gloria illius æmula, interes. Difficile est equidem ab humanis non tantum rebus, sed verbis mortalitatem excludere. Itaq; invitus licet, pace tua Respublica, pace vestra ò Poloni dixerim, tu quoq; Vladislæ Rex Invictissime, cum humanum hunc terrarum incolatum (ò utinam sero! ò! si licet optare, tum cum natura finem acceperit) reliqueris, Serenissimam prolem tuam è cœlis prospectans, cœlesti pariter & humana immortalitate perfrueris: illi juxta atq; huic præsens, illi quidem in te, huic autem in tui parte, id est Filio. Non jam habent in te locum illæ querelæ, ad quas, Cambyfes Regis Persarum Cyri filius, fato occulto pervenit; ut æmulatus, omnium virtutum imitatione, parentem, cum an Patri Cyro par videretur è suis quæreret? ingratum acciperet responsum. *Non videri Cambysem Patri æquandum, quod non esset illi filius talis, qualem parens reliquisset.* Tu tamen Rex Serenissime non tam tibi, quam nobis gaudes, quorum auxilio, gloriæ, munimentò datus, etiam post fata Rempublicam curare non desines. Nam, erat illud tempus, quo Regibus orbata Polonia, peregrinam debuit invocare virtutem, ut congruè libertati, nec publice incolumitati omnino aliquando incommodè; nec tamen semper commode. Cum enim Reges quæreret, bella etiam invenit: donec parens tuus Serenissimus, reddidit nobis per te, desideratum Iagiellonum sanguinem, & cum cognata virtutis magnificentia, optatam tranquillitatem. Liberi quidem sunt, erunt, ut esse debent Poloni; atq; Principes non accipiunt, sed eligunt, nulli utpote nisi virtuti parere assueti: nihilominus, cum domi qui imperet reperitur, peregrinari cum suffragijs non assueverunt. Æquum est, magnificum est, gloriosum est, imperaturum omnibus, ex omnibus eligi; at quis congruum, ex Polonis unquam judicavit,



fortunam per orbem quærere, quæ intra ædes teneretur. Cui præterea obscurus est, ingens totius Poloniæ erga Vladislaum Regem animus, & consentiens populorum omnium concordia, aut Vladislaum, aut Vladislao simillimum, semper habere optantium. Quis verò Parenti similior, quàm filius? ei præsertim Parenti, qui vitæ munere parens est, disciplina magistrum, exemplo ducem se exhibet. Recedat igitur, recedat procul animo cogitatio, quam commoditas materiæ intrudit, ut ego aliquid de Principis nostri institutione agam. Dixi ante, quæ alijs Principibus conveniunt: at de Principe nostro nihil dicendum restat, quia quod alij præceptis docentur, ille exemplo discit. Neque enim Princeps Serenissime, alia Tibi norma aut regula, ad publicam fælicitatem vivendi proposita esse debet, quàm Regum Optimorum, Augustissimum exemplar, Rex & Parens Vladislaus. Hunc Tu inspicere, hunc imitare, hunc exprime: sic Tibi, sic Nobis, sic orbis expectationi par evasurus. Ad Sceptra te a natura editum, regia tua fors monet: vide igitur ut illa Vladislaus Rex tractet. Ad diademata Te natum intelligis: vide quâ fortitudine, quibus meritis illa Vladislaus Rex suscepit. Adorat Te Suecia, Gottia, Vandalia hæreditarium Principem: non recusat per virtutis suffragia, Tuo subijci Polonia Imperio: alterum perduellibus eripies, alterum autem mereberis, cum Vladislao evaseris simillimus. Nam quod Regna illa, Tibi naturæ jure mancipata, turpem tam diu servitutem ferunt, primum quidem fato id quodam contingit: tum verò incredibili quadam Vladislai Regis erga nos pietate, qui patitur sibi tam amplum ac regale patrimonium subtrahi, ne quietem nostram armis interpellat. Erit tamen, erit illud tempus, quo Regna olim nobilissima, malorum suorum pertæsa, ad Principem suum respicient, eligentq; obtemperare dominis, quàm mancipari servis. Quis scit, an hoc superis steterit edictum, catulos illos regnatricis lænæ subreptitios, alienisq; incubantes specubus, aut in victimam, ante Sigismundum Principem casuros, aut Dominum, supplici deditioe agnituros. Tu verò interea Princeps Serenissime, perge felix ex voto omnium publico, ad exoptatam spei nostræ maturitatem: promove, desideriorum nostrorum maioribus crescentium in dies virtutum passi-



passibus segnitiam, vige, cresce, vota quoque nostra vince. Optare plus quam optamus, non possumus, at Tu Principum gradu, vulgi parva desideria transcendere, donec ad illos lagiellones, illos Austriacos accedas. Obversatur enim menti meae, non haec tantum tua, sed illa quoque aetas, quae inter primum humanae vitae usum; & inter honoris emeritas dignitates, media intervenit: animo grandis, robore vivida, aevi flore conspicua. Videor igitur Te videre, non tam turmis hominum, quam virtutum, pietatis, integritatis, sanctitatis, temperantiae, moderationis stipatum: inter nobilissimae juventutis agmen perillustre, ceteris tam alte eminentem, quantum reliquos omnes Principis superas dignitate. Videor intueri, oculos hominum in Te conversos, admirationem in Te defixam, studia Tibi devota: Te verò speciosissimis regalis animi insignibus conspicuum, maius aliquod ceteris, opus virtutis molientem. Quis tum satiare aspectum vultu tuo, quis ora laudibus poterit? Ibis gloriosus quo Te vestigia Maiorum tuorum, per amplissima nobilissimorum facinorum spatia deducunt, nos verò jam non spes nostras, quas nunc a longè suspicimus, verum publica commoda solatiaque; Te per laudes secuti colligemus. O felices illos soles, qui nobis lucem operum tuorum aperient! o beata tempora, quae tuo splendore, quam sua dignitate clarius nitescant! o ver aetatis tuae gratissimum! o vitae spatia, iustitiae cultu composita, temperantia sacra, prudentia veneranda, fortitudine admirabilia, omni denique genere virtutum opulentissima.

*Atque tam subito nova.*  
**A** Terrarum, facies? iuvenescent singula regni  
 Lechiaci decora: an lepidis mens sobria vatem  
 Delectat ostentis? senile  
 Cum plumis exuit robur  
 Ille ipse nido & prole clarus inclytâ  
 Signifer Regni generosus ales.  
 Et jam Trinacrijs novum caminis  
 Fulmen recussum fert recenti  
 Viuidus rostro, geminumque Moschi  
 Diuidit telo caput irretorto  
 Alitis, audax vincere, vinci



Assuetum, hinc vitrei littora Vistula  
 Paena clangunt. quaeq; refundere  
 Aurum obsoleta mercis, & indigam  
 Auarioris copiae sitim,  
 Lechicis olim didicere Regnis:  
 Jam graues ferro reuehunt carinas  
 Jam gladios & acuta belli  
 Nouo ministrant militi.  
 Quin ipsa sponte nasci arma imperat,  
 Natura Lechis prouida:  
 Subruit alto turbine putres  
 Quercus, & ornos tollit inutiles,  
 Plantasq; in arma fabricat nouas.  
 Gnositis arbor tiliae sagittis  
 Frondet, in flexos sinuatur arcus  
 Corneis ilex animosa nodis:  
 Fraxinus in teretes truncos, ut cespite ab imo  
 Quot trunci teretes sunt, tot consurgat in hastas.  
 Arcusq; parui, hastaq; parua  
 Cum plantis solide crescunt, & ab arbore adulta  
 Accipiunt robur.  
 Ipse grauis senio crudum thoraca lacertis  
 Exuit antiquis Mauors, & pondus honestum  
 Ingentis gladij paruum commutat in ensen  
 Atq; iterum iuuenis, primos puerilis in ausus  
 Lorica modico cingit sua pectora ferro.  
 Nec gracilem versare pudet iuuenilibus hastam  
 Palmis, nec tenui paruas numerare pharetra  
 Rite Neoptolemi, ad belli rudimenta sagittas.  
 Eheu Poloni prodigiosior  
 Succedit etas? non male Sarmatas  
 Bellona ridet, non male Sarmatis  
 Fata Mauortem renouant adultum,  
 Cum puero sua Regna Rege  
 Marsq; ipse crescit cum puero Puer.



*Jam diu pacis super otiosa  
Dormit stratum, pigra feriarum  
Jam diu nullis speciosus armis,  
Festa sub tecto salit Africanis  
Splendido tignis, pudet heu! supinum  
Induit plumis caput, & Lybissa  
Aletis cristas, galeaq; toruam  
Gargonem, cistis, vitio senecta  
Obserat. Inde alio labuntur tempora gyro.  
Stringe aciem iuuenis Mauors, post longa senecta  
Tedia, & ad Pueri proprior penetralia Regis  
Fer teretes clypeos, fer parua hastilia ludo,  
Et globulos, volucresq; pilas, & ludicra ferri  
Oria, & exigui plumbum vocale Colubri.  
Infantie Regalis horum  
Amor, paternam natus adoream  
Aequare, primis dum licet osculis  
Ferrum osculatur: brachia pensilem  
Rapturus ensen tendit, & horrida  
Aspice quam stricti puerum delectat imago  
Ferri, vulnificusq; chalybs & abenea rauco  
Machina mugitu reboans.*

*Quisquamne sensus Balchidos equori  
Dudum rebelli? num resonas caua  
Concha triremes cedere pertinax  
Innare gestiet Polonos  
Visurum gladios, non sine liuido  
Pallore, vindici mucrone iustos,  
Et iuueni sua signa Marti  
Opponet? Eheu perduellem  
Qui ferro repeter vindice Gottiam,  
Jam puer paruo lateri fidelem  
Subligat ensen,  
Jam fuluum capuli versat ebur, ferox,  
Innoxiosq; exercet ictus,*



Mox refugo metuendus hosti.

Ille & gramineo fingere cespite

Vallum peritus, castraq; mutuis

Arcere fossis, & locare

Hâc equitum statione turmas,

Illâ pedestres, non pueriliter

Secum consilio certat, & hosticas

Hâc arte Regius puer cateruas

Cedere suas,

At tenero meditatur ungui.

An & Pelasgus non metuit latro?

Olim pauper ad algidas

Caucasi rupes, modo gloriose

Virtute an astu victor Achaia?

Piget fateri. Tollite barbari

Luna occidentis signa, cruentior

Sors aleam mutare cogit,

Atq; iterum meliore Marte

Retro palantes Asia Tyrannos,

Regnorum spoliis graues

Jam diu, ad limen patrium reduci,

Arcesq; Bizanti superbas,

Pro Caspijs mutare vicis,

Iugoq; rursus colla reciproco

Impie multis dominata Regnis

Subijci Fatum est. Oriens videbit.

An seruitutis anxius nimis sua,

Posse desperat fieri, suoq;.

Eripi seruus dubitat Tyranno

Posse? me vatem generosus audi

Eoe surges. Nam mihi Sarmata

REX ORIENS, ita fatus. Eben

Fatidicis liquido volucrem super aethere pennis,

Mens iterum mea me reliquit.









